



REPUBLIKA E KOSOVËS / REPUBLIKA KOSOVA

GJYKATA THEMELORE FERIZAJ

Numri i lëndës: 2023:229317

Datë: 26.04.2024

Numri i dokumentit: 05624570

**NË EMËR TË POPULLIT**

**GJYKATA THEMELORE NË FERIZAJ - Departamenti i Përgjithshëm, divizioni penal,** me gjyqtarin e vetëm gjykues Dardan Maloku, me zyrtaren ligjore Ardita Tasholli, në çështjen penale ndaj të pandehurit B.O., nga Ferizaj rruga "...", për shkak të veprës penale Posedimi i paautorizuar i narkotikëve, substancave psikotrope ose analoge nga neni 269 paragrafi 2 të Kodit Nr. 06/L-074 Penal të Republikës së Kosovës (tani e tutje KPRK-së), sipas Aktakuzës të paraqitur nga Prokuroria Themelore në Ferizaj – Departamenti i Përgjithshëm, PP.II.nr.1559/2023 të datës 16.04.2024, pas mbajtjes së shqyrtimit fillestar, të hapur për publikun, i cili është mbajtur më datë 16.04.2024, në të cilin morën pjesë prokurori i shtetit Ardian Emini prokuror në Prokurorinë Themelore në Ferizaj dhe i pandehuri B.O., pas pranimit të fajësisë nga ana e të pandehurit, më datë 16.04.2024, mori dhe publikisht shpalli, kurse më datë 26.04.2024, përpiloi këtë:

**AKTGJYKIM**

**I pandehuri:**

**B.O.**, nga i ati H., e ëma M., e gjinisë A., i lindur më datë ... në Ferizaj, me vendbanim në rrugën "... komuna Ferizaj, me vendqëndrim të përkohshëm në Gjermani, me numër personal ....., i pa martuar, ka të kryer shkollën e mesme, i gjendjes së mesme ekonomike, shqiptar, shtetas i Republikës së Kosovës.

**ËSHTË FAJTOR**

### **Sepse:**

Me datë 22.09.2023, rreth orës 00:05 h saktësisht në fshatin ... Komuna Ferizaj, i pandehuri pa autorizim ka poseduar substancë narkotike të llojit mariuhanë me peshë prej 1.934 gram, në atë mënyrë që përderisa zyrtarët policor kishin qenë duke patrulluar në rrugën e fshatit ... Komuna Ferizaj dhe kishin ndal për kontroll veturën e tipit VW ngjyrë e bardhë me targa 05- ... të cilën kishte qenë duke e vozitur vetë i pandehurit, dhe gjatë kontrolli tek i njëjti ju është gjetur një sasi e substancës narkotike e llojit mariuhanë me peshë prej 1.934 gram, me ç ‘rast edhe i’u sekuestrohet përkohësisht.

- Me këtë ka kryer veprën penale veprën penale **Posedimi i paautorizuar i narkotikëve, substancave psikotrope ose analoge** nga neni 269 paragrafi 2 të KPRK-së.

Andaj, gjykata në bazë të neneve 4, 7, 8, 17, 21, 38, 43, 69, 70, dhe 269 paragrafi 2 dhe 3 të KPRK-së, si dhe neneve 364, 452 dhe 455 paragrafi 1 të Kodit të Procedurës Penale (KPP-së), të pandehurin e:

### **G J Y K O N**

- I. Dënim me gjobë në shumën prej 400 (katërqind) euro, të cilën shumë i pandehuri është i obliguar ta paguaj brenda afatit prej 30 (tridhjetë) ditësh pas plotfuqishmërisë së këtij aktgjykimi.
- II. Nëse i pandehuri nuk mundet apo nuk dëshiron ta paguajë dënimin me gjobë, të njëjtit në pajtim me nenin 43 paragrafi 3 të KPRK-së, dënimi me gjobë do të zëvendësohet me dënim me burgim, ashtu që për 20 (njëzetë) euro gjobë të papaguara, i pandehuri do të vuajë 1 (një) ditë burgim.
- III. Në bazë të nenit 269 paragrafi 3 të KPRK-së, **KONFISKOHET** substanca narkotike e sekuestruar e llojit “Mariuhanë” me peshë 1.934 gram.
- IV. Obligohet i pandehuri në emër të shpenzimeve të paushallit gjyqësor të paguaj shumën prej 20 (njëzet) euro si dhe për fondin e kompensimit të viktimave të dhunës shumën prej 20 (njëzet) euro, brenda afatit prej 30 (tridhjetë) ditëve nga dita e plotfuqishmërisë së këtij aktgjykimi.

### **A r s y e t i m**

## **1.Rrjedha e çështjes**

Prokuroria Themelore në Ferizaj - Departamenti i Përgjithshëm më datë 26.10.2023, ka ngritur aktakuzën PP.II.nr.1559/2023, kundër të pandehurit B.O. për shkak të veprës penale Posedimi i paautorizuar i narkotikëve, substancave psikotrope ose analoge nga neni 269 paragrafi 2 të KPRK-së.

Me datë 16.04.2024, pranë kësaj gjykate është mbajtur seanca e shqyrtimit fillestar në të cilën ishin prezent prokurori i shtetit Ardian Emini prokuror në Prokurorinë Themelore në Ferizaj dhe i pandehuri B.O..

Pas leximit të aktakuzës nga ana e prokurorit të shtetit, i pandehuri ka deklaruar se e ka kuptuar në tërësi aktakuzën dhe veprën penale për të cilën akuzohet dhe se e pranon fajësinë për kryerjen e veprës penale e cila i vihet në barrë andaj gjykata pas dëgjimit të palëve dhe në pajtim me nenin 242 paragrafi 2 të KPP-ës, ka marrë aktvendim me të cilin ka aprovuar pranimin e fajësinë nga ana e të pandehurit.

## **2.Vlerësimi i pranimi të fajësisë**

Gjykata pas mbajtjes së shqyrtimit fillestar në të cilin kanë qenë prezentë palët e lartcekura dhe pas dëgjimit të palëve ka marrë aktvendim me të cilin ka aprovuar pranimin e fajësisë nga ana e të pandehurit për veprën penale për të cilën akuzohet ngase ka konstatuar se janë plotësuar gjitha kushtet ligjore të cilat kërkohen me nenin 242 paragrafi 2 të KPP-së dhe se pranimi i fajësisë nga ana e të pandehurit nuk është kundërshtuar nga ana e palëve të cilat ishin prezentë.

Në këtë aspekt gjykata ka konstatuar se i pandehuri e ka kuptuar drejtë natyrën dhe pasojat e pranimi të fajësisë, se pranimi i fajësisë është bërë vullnetarisht nga ana e të pandehurit dhe i njëjti nuk ka qenë i detyruar ose i shtrënguar në asnjë mënyrë që të pranojë fajësinë. Pranimi i fajësisë mbështetet në faktet e çështjes të cilat i përmban aktakuza siç janë: raporti fillestar i incidentit me numër të rastit 2023-CF-2091, i datës 22.09.2023, raporti i oficerit i datës 22.09.2023, deklarata e të pandehurit B.O. e dhënë në Stacionin Policor në Ferizaj më datë 22.09.2023, Vërtetimi mbi sekuestrimin e përkohshëm të sendeve i datës 22.09.2023, Zinxhiri i ruajtjes i datës 22.09.2023, raporti i testit fushor i datës 06.10.2023, foto dokumentacioni si dhe shkresat e tjera që gjenden në lëndë, po ashtu me rastin e pranimi të fajësisë nga ana e të pandehurit gjykata gjeti se aktakuza lëndore nuk përmban asnjë shkelje të qartë ligjore ose gabime faktike.

### **3.Gjendja faktike e vërtetuar**

Duke u bazuar në të lartcekurat, gjykata vërtetoi këtë gjendje faktike: se i pandehuri B.O., ka kryer veprën penale Posedimi i paautorizuar i narkotikëve, substancave psikotrope ose analoge nga neni 269 paragrafi 2 të KPRK-së, në kohën, vendin dhe mënyrën e përshkruar si në dispozitiv të këtij aktgjykimi.

### **4. Rrethanat që janë marrë për bazë me rastin e shqiptimit të dënimit**

Gjykata me rastin e matjes së dënimit ka vlerësuar që të pandehurit ti shqiptohet dënim me gjobë në shumën prej 400 (katërqind), të cilën shumë i pandehuri është i obliguar ta paguaj brenda afatit prej 30 (tridhjetë) ditësh pas plotfuqishmërisë së këtij aktgjykimi, ngase duke i marrë parasysh të gjitha rrethanat dhe provat të cilat gjinden në shkresat e lëndës, ky dënim do të jetë i drejtë, në harmoni me peshën e veprës penale dhe përgjegjësinë penale të kryesit dhe si i tillë me këtë dënim mund të arrihen qëllimet e dënimit në kuptim të nenit 38 të KPRK-ës. Gjithashtu gjykata me rastin e matjes së dënimit ka marrë për bazë edhe rrethanat që ndikojnë në llojin dhe lartësinë e dënimit duke u bazuar në nenet 69 dhe 70 të KPRK-së, ashtu që rrethanë lehtësuese për të pandehurin ka marrë: pranimin e fajësisë në shqyrtim fillestar, faktin se i njëjti është penduar për veprën penale që e ka kryer, është hera e parë që kryen veprë penale, premtimin e tij që në të ardhmen nuk do të kryej vepra të tilla dhe as vepra të tjera penale, ndërsa rrethana rënduese nuk gjeti.

Gjykata konsideron se me dënimin e shqiptuar ndaj të pandehurit mund të arrihen qëllimet e dënimit të parapara në nenin 38 të KPRK-së e që konsistojnë në parandalimin e kryesit nga kryerja e veprave penale në të ardhmen dhe të bëjë rehabilitimin e tij, të parandalojë personat e tjerë nga kryerja e veprave penale dhe të shprehë gjykimin shoqëror për veprën penale, ngritjen e moralit dhe forcimin e detyrimit për respektimin e ligjit.

### **5. Vendimi lidhur me konfiskimin e substancës narkotike**

Neni 269 paragrafi 3 i KPRK-së përcakton shprehimisht se: “*Substancat narkotike, substancat psikotrope ose substancat analoge konfiskohen*”. Andaj, duke u bazuar në këtë dispozitiv ligjore u vendos si në pikën III të dispozitivit të këtij aktgjykimi.

### **6.Vendimi mbi shpenzimet e procedurës penale**

Duke pasur parasysh natyrën e kësaj çështje penale gjykata duke u bazuar në nenin 452 paragrafi 1 të KPP-së, ka vendosur që ta detyrojë të pandehurin që të paguaj paushallin

gjyqësor në shumën prej 20 (njëzet) euro, si dhe duke u bazuar në nenin 36 paragrafi 3 nën paragrafi 3.1 të ligjit Nr. 08/L-109, për Kompensimin e Viktimave të Krimit shumën prej 20 (njëzet) Euro.

Andaj duke u bazuar në të lartcekura gjykata vendosi si në dispozitiv të këtij aktgjykimi.

**GJYKATA THEMELORE NË FERIZAJ**  
**Departamenti i Përgjithshëm – Divizioni Penal**  
**2023:229318, me datë 26.04.2024**

**Zyrtarja Ligjore,**  
Ardita Tasholli

**Gjyqtari i vetëm gjykues,**  
Dardan Maloku

**KËSHILLA JURIDIKE:** Kundër këtij aktgjykimi mund të paraqitet ankesë në Gjykatën e Apelit në Prishtinë, në afat prej 30 (tridhjetë) ditëve nga dita e pranimi të të njëjtit. Ankesa në kopje të mjaftueshme i paraqitet Gjykatës Themelore në Ferizaj. Mirëpo palët kanë hequr dorë nga e drejta në ankesë.